



**SECONDA SESSIONE URDINARIA DI U 2019**  
**2EME SESSION ORDINAIRE DE 2019**  
**RIUNIONE DI I 28 È 29 DI NUVEMBRI**  
**REUNION DES 28 ET 29 NOVEMBRE**

2019/O2/110

***Dumanda à bocca sposta da Romain COLONNA***  
***à nomu di u gruppu « Femu A Corsica »***

**Ogettu : Xylella fastidiosa**

O Sgiò Pridente di u Cunsigliu esecutivu di a Corsica,

Fine d'ottobre, in Aiacciu, ci hè stata a sigonda cunfarenza aurupea nantu à a Xylella fastidiosa chì hà addunitu più di 350 circadori di u mondu sanu, urganizata da l'Autorità aurupea di sicurezza di l'alimenti (EFSA), a rete Euphresco pà a cuurdinazione è u finanziamentu di a ricerca fitosanitaria, l'Istitutu naziunale di ricerca agronomica (INRA), l'Agenza naziunale di sicurezza sanitaria di l'alimentazione, l'ambiente è di u travagliu (ANSES), da i prugetti aurupeu Urizonti 2020 POnTE è X-F-Actors, è da a Cullettività di Corsica cù, in particolare, l'uffiziu di l'ambiente è u Cunservatoriu botanicu naziunale di Corsica.

À tempu à quella manifestazione, palisava a stampa isulana infurmazione in giru à a Xylella fastidiosa è l'introduzione in Corsica di parechji millai d'arbori vinuti da u Cuntinente. S'intarrugava ancu, par un dettu, nantu à e pussibilità pà a Corsica da quì à calchi annu di pruce sempre oliu d'alivu.

L'ultimi studii fatti da l'INRA di Montpellier palesanu chì e varietà d'alivi di u Pumontu, a zinzala è a ghjermana, ùn resistenu à a Xylella fastidiosa pauca chì tocca dinò altri arbori.

In lu 2015 era scuparta a malatia in Corsica. In lu 2018, eranu 350 i lochi à esse tocchi in l'isula. Tandù, sò state messe in ballu misure di ristriczione. È puru imparemu ch'elle sò state calate da u Statu quelle misure. Solu pà custannu si dice

ch'elli sò 10 000 i pedi d'alivi d'urnamenti chì sarianu ghjunti cù auturizzazione da u Cuntinente.

Ùn hè micca a prima volta chì a nostra Assemblea s'intarrugheghja di pettu à issu sugettu di primura è ci raligremu chì a Cullettività di Corsica abbiu participatu à l'organizzazione è à u sbuccinamentu di quella manifestazione internazionale in Aiacciu.

Ma partendu da u fattu chì, par avà, suluzione di trattamentu efficace contru à l'insetti chì strascinanu è trasmettenu a malatia ùn ci ne hè, vuliamu sapè à chì ne eramu di e misure di ristrazione decise da u Statu in quantu à l'introduzione di l'arburi in Corsica ? È in modu liatu à issa dumanda à chì ne eramu di u quaternu di e cariche di pruduzione locale pruposte à e pepiniere di l'isula.

À ringrazià vi.